



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

06.06.2019թ.

Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ԳԲՔԱ-ԼՕ-2019/27

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Ռ. Մկրտչյանի

Մասնակցությամբ՝

Պատվիրատու Երևանի քաղաքապետարանի ներկայացուցիչ՝ Գ. Մուրադյան

ՀՀ գնումների հետ կապված բողոքներ քննող անձը (այսուհետ՝ նաև Բողոքներ
քննող անձ)՝ քննության առնելով «Մովսեսյան» ՍՊԸ-ի (այսուհետ՝ նաև Ընկերություն)
կողմից 07.05.2019թ. ներկայացրած բողոքը (այսուհետ՝ նաև Բողոք) և կից փաստաթղթերը,

Պ Ա Ր Զ Ե Ց

1. Գործի նախապատմությունը

Դիմելով ՀՀ գնումների հետ կապված բողոքներ քննող անձին՝ Ընկերությունը
ներկայացրած բողոքով խնդրել է՝

1. Դադարեցնել «ԵԲ-ԳՀԱՊՁԲ-19/45» ծածկագրով գնահատող հանձնաժողովի 30.04.2019թ. ժամը 11:00-ին ընդունված թիվ 4 արձանագրության 1.2 և 1.3 կետերով կայացված «Մովսեսյան» ՍՊԸ-ի հայտարարությունը իրականությանը չհամապատասխանող որակելու մասին, ինչպես նաև 5-րդ չափաբաժնի մասով չկայացած հայտարարելու մասին որոշումը:

2. Պարտավորեցնել «ԵԲ-ԳՀԱՊՁԲ-19/45» ծածկագրով գնահատող հանձնաժողովին հայտը ներկայացնելու օրվա դրությամբ ժամկետանց հարկային պարտավորություն չունենալու մասին «Մովսեսյան» ՍՊԸ-ի ներկայացրած հայտարարությունը համարել իրականությանը համապատասխանող:

3. Պարտավորեցնել սույն բողոքում ներկայացված հիմնավորումների շրջանակում «Մովսեսյան» ՍՊԸ-ի հայտը գնահատել հրավերի պահանջներին համապատասխանող:

Բողոքներ քննող անձի 13.05.2019թ. որոշմամբ բողոքը ընդունվել է վարույթ և 15.05.2019թ. և 24.05.2019թ.-ին նշանակվել են նիստեր:

Բողոքի քննությունն ավարտվել է 24.05.2019թ.-ին և Բողոքներ քննող անձի որոշման հրապարակման օր է նշանակվել 06.06.2019թ.-ին:

2. «Մովսեսյան» ՍՊԸ-ի ներկայացրած փաստերը, հիմնավորումները և պահանջը.

«Մովսեսյան» ՍՊԸ-ն ներկայացրած բողոքով հայտնել է հետևյալը.

«14.04.2019թ.-ին «Մովսեսյան» ՍՊԸ-ն հայտ է ներկայացրել Երևանի քաղաքապետարանի (այսուհետ՝ Գնահատող կամ Պատվիրատու) կողմից հայտարարված ԵԲ-ԳՀԱՊՁԲ-19/45 ծածկագրով գնանշման հարցման ընթացակարգին մասնակցելու նպատակով: Մինչև հայտը ներկայացնելը, «Մովսեսյան» ՍՊԸ-ն Taxservice.am կայքի միջոցով դիտել և համոզվել է, որ 14.04.2019թ. դրությամբ ժամկետանց հարկային պարտավորությունները կազմում են 0 ՀՀդրամ:

Հայտը ներկայացնելու օրվա՝ 14/04/2019թ. դրությամբ՝ «Մովսեսյան» ՍՊԸ-ի կողմից գնային առաջարկ է ներկայացվել 5-րդ չափաբաժնի համար, որի գումարը կազմել է 118,888 ՀՀ դրամ: Միաժամանակ «Մովսեսյան» ՍՊԸ-ն հայտով հայտարարություն է ներկայացրել այն մասին, որ «Գնումների մասին» ՀՀ օրենքի 6-րդ հոդվածի 1-ին մասի իմաստով ունի արվյալ գնման գործընթացի մասնակցության իրավունք, ինչպես նաև՝ բավարարում է նույն

հողվածի 3-րդ մասով սահմանված, հրավերով նախատեսված որակավորման չափանիշներին:

19.04.2019թ.-ին Գնահատողը էՓ միջոցով տեղեկացրել է, որ «Մովսեսյան» ՍՊԸ-ն 1-ին տեղ զբաղեցրած մասնակից է ճանաչվել 5-րդ չափաբաժնի մասով, և 22.04.2019թ. «Մովսեսյան» ՍՊԸ-ն Գնահատողին է ուղարկել հրավերով նախատեսված հ.6 և 6.1 հավելվածները, լրացված և վավերացված:

30.04.2019թ.-ին Գնահատողից էլեկտրոնային փոստի միջոցով ստացվել է գրություն, հետևյալ բովանդակությամբ՝ «Տեղեկացնում եմ, որ ընկերությունը ունի ժամկետանց հարկային պարտավորություն 1400 ՀՀ դրամի չափով, ուստի ընկերության հայտը մերժվել է»:

Նշված գրության բովանդակությանը ծանոթանալուց հետո, կապնվելով հարկային մարմնի հետ, պարզել ենք, որ հայտը ներկայացնելու օրվա դրությամբ «Մովսեսյան» ՍՊԸ-ի ժամկետանց պարտավորությունը կազմել է 1400 ՀՀ դրամ, որը արտացոլված չի եղել Taxservice.am էլեկտրոնային կայքի «հարկային պարտավորություններ» բաժնում, քանի որ վերաբերվում է ՀՀ պաշտպանության նախարարությանը փոխանցվող 1000 դրամներին (դրոշմանիշային վճարներ), որոնց վերաբերյալ տվյալները նախկինում չեն արտացոլվել ոչ թղթային և ոչ էլեկտրոնային քաղվածքներում: Նշված պարտավորությունը գոյացել է 2017թ. նոյեմբեր ամսից սկսած, սակայն չի արտացոլվել Taxservice.am կայքի միջոցով ստացված հարկային պարտավորությունների վերաբերյալ տվյալներում, ինչի հետևանքով «Մովսեսյան» ՍՊԸ-ն սխալ տվյալ է ունեցել ժամկետանց հարկային պարտավորություն չունենալու մասին, իսկ 2018թ. ընթացքում հարկային մարմնից թղթային եղանակով առձեռն ստացված տեղեկանքներում նշված պարտավորության վերաբերյալ տեղեկություն եղած չլինելու հետևանքով՝ Taxservice.am կայքից ստացված վերջին տեղեկատվությունը համարել է արժանահավատ:

Հիմք ընդունելով այն հանգամանքը, որ «Մովսեսյան» ՍՊԸ-ն հնարավորություն չի ունեցել դրոշմանիշային վճարի մասով ժամկետանց պարտավորություն ունենալու մասին տեղեկություն ստանալու, իսկ հարկային մարմնից ստացված տեղեկատվությունը ուղղակի վկայել է այն մասին, որ «Մովսեսյան» ՍՊԸ-ն հայտը ներկայացնելու օրվա դրությամբ չունի ժամկետանց հարկային պարտավորություն, ուստի և «Մովսեսյան» ՍՊԸ-ի ներկայացրած տեղեկությունը պետք է համարել իրականությանը համապատասխանող»:

Ելնելով վերոգրյալներից, Ընկերությունը Բողոքներ քննող անձին խնդրել է՝

1. Դադարեցնել «ԵՔ-ԳՀԱՊՁԲ-19/45» ծածկագրով գնահատող հանձնաժողովի 30.04.2019թ. ժամը 11:00-ին ընդունված թիվ 4 արձանագրության 1.2 և 1.3 կետերով կայացված «Մովսեսյան» ՍՊԸ-ի հայտարարությունը իրականությանը չհամապատասխանող որակելու մասին, ինչպես նաև 5-րդ չափաբաժնի մասով չկայացած հայտարարելու մասին որոշումը:

2. Պարտավորեցնել «ԵՔ-ԳՀԱՊՁԲ-19/45» ծածկագրով գնահատող հանձնաժողովին հայտը ներկայացնելու օրվա դրությամբ ժամկետանց հարկային պարտավորություն չունենալու մասին «Մովսեսյան» ՍՊԸ-ի ներկայացրած հայտարարությունը համարել իրականությանը համապատասխանող:

3. Պարտավորեցնել սույն բողոքում ներկայացված հիմնավորումների շրջանակում «Մովսեսյան» ՍՊԸ-ի հայտը գնահատել հրավերի պահանջներին համապատասխանող:

3. Երևանի քաղաքապետարանի կողմից բողոքի վերաբերյալ ներկայացված փաստարկները, հիմնավորումները և դիրքորոշումը.

Բողոքներ քննող անձը 13.05.2019թ. գրությամբ դիմել է Երևանի քաղաքապետարանին՝ (այսուհետ նաև՝ Պատվիրատու), հնարավորություն տալով «Մովսեսյան» ՍՊԸ-ի կողմից 07.05.2019թ. ներկայացված բողոքի վերաբերյալ ներկայացնել անհրաժեշտ բոլոր փաստաթղթերի պատճեններն ու Պատվիրատուի գրավոր կարծիքը:

Պատվիրատուն ներկայացնելով բողոքի քննության համար նշանակություն ունեցող բոլոր փաստաթղթերի պատճենները գրավոր կարծիք չի հայտնել:

Պատվիրատուի ներկայացուցիչը ներկայանալով նիստին, բանավոր կերպով հայտնել է, որ «Մովսեսյան» ՍՊԸ-ն ճանաչվել է առաջին տեղ զբաղեցնող մասնակից: 23.04.2019թ. հարցում է արվել ՀՀ ՊԵԿ, որին ի պատասխան ստացվել է տեղեկատվություն, որ մասնակիցը ունի 1400 ՀՀ դրամ ժամկետանց հարկային պարտավորություն:

4. ԳԲՔԱ-ԼՕ-2019/27 բողոքի քննության համար էական նշանակություն ունեցող փաստերը.

Սույն գործի փաստերի համաձայն՝

Երևանի քաղաքապետարանի (այսուհետ նաև՝ Պատվիրատու) կողմից էլեկտրատեխնիկայի ձեռքբերման նպատակով հայտարարվել է «ԵԲ-ԳՀԱՊՁԲ-19/45» ծածկագրով գնանշման հարցման ընթացակարգ (այսուհետ նաև՝ Ընթացակարգ):

Ընթացակարգի շրջանակում, ի թիվս այլ մասնակիցների 14.04.2019թ. հայտ է ներկայացրել նաև «Մովսեսյան» ՍՊԸ-ն:

Գնահատող հանձնաժողովի 22.04.2019թ. նիստի թիվ 3 արձանագրության համաձայն՝ «Մովսեսյան» ՍՊԸ-ն 5-րդ չափաբաժնի մասով ճանաչվել է առաջին տեղ զբաղեցնող մասնակից:

Ընթացակարգերի շրջանակներում գնահատող հանձնաժողովի կողմից 23.04.2019թ. ՀՀ պետական եկամուտների կոմիտե արված հարցումների արդյունքում պարզվել է, որ «Մովսեսյան» ՍՊԸ-ն հայտը ներկայացնելու (14.04.2019թ.) օրվա դրությամբ հարկային մարմնի կողմից վերահսկվող եկամուտների գծով ունեցել է ժամկետանց պարտավորություն՝ 1400 ՀՀ դրամ գումարի չափով:

Ընթացակարգի գնահատող հանձնաժողովը, հիմք ընդունելով ՀՀ պետական եկամուտների կոմիտեի կողմից տրամադրված տեղեկատվությունը, 30.04.2019թ. թիվ 5 արանագրությամբ կայացված որոշմամբ՝ «Մովսեսյան» ՍՊԸ-ի կողմից ներկայացված հայտարարությունը համարել է իրականությանը չհամապատասխանող և մերժել է Ընկերության հայտը, իսկ գնման ընթացակարգը 5-րդ չափաբաժնի մասով հայտարարել է չկայացած:

Հայաստանի Հանրապետության կառավարությանն առընթեր պետական եկամուտների կոմիտեի նախագահի 2018թ. ապրիլի 11-ի թիվ 245-Ա հրամանով սահմանված հավելվածի՝ հարկ վճարողի անձնական հաշվի քարտի 14.04.2019թ. դրությամբ «Մովսեսյան» ՍՊԸ-ի հարկային մարմնի կողմից վերահսկվող եկամուտների գծով պարտավորությունների, դեբետային գումարների, սահմանված չափից ավել վճարված գումարների, միասնական հաշվում առկա գումարների, հարկային մարմնի տեղեկատվական բազայում առկա տեղեկությունների հիման վրա պաշտոնական քաղվածքի համաձայն՝ Ընկերությունը չունի ժամկետանց հարկային պարտավորություններ:

ՀՀ պետական եկամուտների կոմիտեի կողմից 22.04.2019թ. Ընկերությանը տրված թիվ 621 տեղեկանքի համաձայն՝ 1400 ՀՀ դրամ գումարի չափով պարտավորությունը գոյացել է «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն վճարման ենթակա դրոշմանիշային վճարների գծով:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացությանը, որ «Մովսեսյան» ՍՊԸ-ի կողմից 07.05.2019թ. ներկայացված բողոքն ենթակա է բավարարման, հետևյալ պատճառաբանությամբ.

Այսպես՝

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 2-րդ կետի համաձայն՝ ... գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի, քան հիսուն հազար Հայաստանի Հանրապետության դրամը գերազանցող ժամկետանց պարտավորություններ:

Օրենքի 50-րդ հոդվածի 7-րդ մասի 1-ին կետի համաձայն՝ գնումների հետ կապված բողոքներ քննող անձն իրավունք ունի պատվիրատուի և գնահատող հանձնաժողովի գործողությունների կամ անգործության վերաբերյալ ընդունելու հետևյալ որոշումները.

ա. արգելելու կատարել որոշակի գործողություններ և ընդունել որոշումներ,

բ. պարտավորեցնելու ընդունել համապատասխան որոշումներ, ներառյալ՝ չկայացած հայտարարելու գնման ընթացակարգը, բացառությամբ պայմանագիրը անվավեր ճանաչելու մասին որոշման:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ նաև Կարգ) 32-րդ կետի 1-ին ենթակետի «բ» պարբերության համաձայն՝ մասնակիցը հայտով ներկայացնում է իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին:

Կարգի 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից

վերահսկվող եկամուտների գծով ժամկետանց պարտավորությունների, ինչպես նաև ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը:

Կարգի 44-րդ կետի համաձայն՝ կոմիտեն նույն կարգի 43-րդ կետի 3-ին ենթակետով նախատեսված հարցումն ստանալու օրվան հաջորդող երկու աշխատանքային օրվա ընթացքում էլեկտրոնային եղանակով պատվիրատուին տրամադրում է հարցման մասին տեղեկատվություն: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից:

ՀՀ ՊԵԿ նախագահի 2017թ. հուլիսի 19-ի թիվ 228-Ն հրամանի համաձայն՝ սահմանված են վերահսկվող եկամուտների գծով պարտավորությունների հետևյալ հարկատեսակները՝ ԱԱՀ, շահութահարկ. եկամտային հարկ, ակցիզային հարկ, շրջանառության հարկ, արտոնագրային հարկ, բնապահպանական հարկ, ոչ ռեզիդենտի շահութահարկ, սոցիալական վճար, պետական տուրք, բնօգտագործման վճար, այլ հարկային եկամուտներ:

ՀՀ հարկային օրենսգրքի 304-րդ հոդվածի 2-րդ մասի 9-րդ ենթակետի համաձայն՝ հարկային մարմինը հարկ վճարողների սպասարկման նպատակով իրականացնում է հետևյալ գործառույթները. ... իրական ժամանակում առցանց եղանակով հարկ վճարողի անձնական հաշվի քարտի (այդ թվում՝ հարկային պարտավորությունների և դրանց մարումների) դիտման հնարավորության ապահովում:

Նույն օրենսգրքի 313-րդ հոդվածի 2-րդ մասի համաձայն՝ հարկ վճարողը հնարավորություն ունի արտատպելու իր անձնական հաշվի քաղվածքը, որտեղ նշված

տեղեկատվությունը համարվում է հարկային մարմնի կողմից հաստատված տեղեկատվություն և, ըստ անհրաժեշտության, ընդունվում է այլ կազմակերպությունների և ֆիզիկական անձանց կողմից:

Սույն գործի փաստերի հիման վրա Բողոքներ քննող անձն արձանագրում է, որ.

Երևանի քաղաքապետարանի կողմից հայտարարված «ԵԲ-ԳՀԱՊՁԲ-19/45» ծածկագրով ընթացակարգի 5-րդ չափաբաժնի մասով «Մովսեսյան» ՍՊԸ-ն ճանաչվել է առաջին տեղ զբաղեցնող մասնակից:

Ընթացակարգերի շրջանակներում գնահատող հանձնաժողովի կողմից 23.04.2019թ. ՀՀ պետական եկամուտների կոմիտե արված հարցումների արդյունքում պարզվել է, որ «Մովսեսյան» ՍՊԸ-ն հայտը ներկայացնելու (14.04.2019թ.) օրվա դրությամբ հարկային մարմնի կողմից վերահսկվող եկամուտների գծով ունեցել է ժամկետանց պարտավորություն՝ 1400 ՀՀ դրամ գումարի չափով:

Ընթացակարգի գնահատող հանձնաժողովը, հիմք ընդունելով ՀՀ պետական եկամուտների կոմիտեի կողմից տրամադրված տեղեկատվությունը, «Մովսեսյան» ՍՊԸ-ի կողմից ներկայացված հայտարարությունը համարել է իրականությանը չհամապատասխանող և մերժել է Ընկերության հայտը, իսկ գնման ընթացակարգը 5-րդ չափաբաժնի մասով հայտարարել է չկայացած:

Հայաստանի Հանրապետության կառավարությանն առընթեր պետական եկամուտների կոմիտեի նախագահի 2018թ. ապրիլի 11-ի թիվ 245-Ա հրամանով սահմանված հավելվածի՝ հարկ վճարողի անձնական հաշվի քարտի 14.04.2019թ. դրությամբ «Մովսեսյան» ՍՊԸ-ի հարկային մարմնի կողմից վերահսկվող եկամուտների գծով պարտավորությունների, դեբետային գումարների, սահմանված չափից ավել վճարված գումարների, միասնական հաշվում առկա գումարների, հարկային մարմնի տեղեկատվական բազայում առկա տեղեկությունների հիման վրա պաշտոնական քաղվածքի համաձայն՝ Ընկերությունը չունի ժամկետանց հարկային պարտավորություններ:

ՀՀ ՊԵԿ նախագահի 2017թ. հուլիսի 19-ի թիվ 228-Ն հրամանի համաձայն՝ սահմանվել են վերհսկվող եկամուտների գծով պարտավորությունների վերաբերյալ տրվող տեղեկանքի ձևը, որտեղ՝ «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝ վճարման ենթակա դրոշմանիշայինի վճարը որպես հարկային մարմնի կողմից վերահսկվող եկամուտների գծով պարտավորություն, նախատեսված չէ:

Տվյալ դեպքում ՀՀ հարկային օրենսգրքի մեջբերված հոդվածների դրույթների՝ գործի փաստերի հետ համադրման արդյունքում պարզ է դառնում, որ Ընկերությունը, օգտվելով իրեն վերապահված իրավունքից, իրացրել է այն, համոզված լինելով դրա օրինականության և ճշտության մեջ՝ որպես հարկային մարմնի կողմից հաստատված տեղեկատվություն:

Ուստի, նման պայմաններում, Բողոքներ քննող անձը գտնում է, որ «Մովսեսյան» ՍՊԸ-ն, արտատպելով հարկ վճարողի անձնական հաշվի քարտի քաղվածքը, չէր կարող չունենալ լիարժեք և միևնույն ժամանակ օբյեկտիվ համոզմունք ստացված տեղեկատվության հավաստիության նկատմամբ:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում Բողոքներ քննող անձը հանգում է այն եզրակացության, որ արձանագրված պարտավորությունը չի կարող դիտարկվել «Մովսեսյան» ՍՊԸ-ի՝ հայտը ներկայացնելու օրվա (14.04.2019թ.) դրությամբ հարկային մարմինների կողմից վերահսկվող եկամուտների գծով ժամկետանց պարտավորություն, քանի որ այն, ինչպես ՀՀ հարկային օրենսգրքի 313-րդ հոդվածն է սահմանում, պետք է համարվի որպես հարկային մարմնի կողմից հաստատված տեղեկատվություն, և անհրաժեշտության դեպքում ընդունվի այլ կազմակերպությունների և ֆիզիկական անձանց կողմից:

Իսկ ինչ վերաբերում է «ԵԲ-ԳՀԱՊՁԲ-19/45» ծածկագրով գնահատող հանձնաժողովին հայտը ներկայացնելու օրվա դրությամբ ժամկետանց հարկային պարտավորություն չունենալու մասին «Մովսեսյան» ՍՊԸ-ի ներկայացրած հայտարարությունը իրականությանը համապատասխանող համարելուն և «Մովսեսյան» ՍՊԸ-ի հայտը հրավերի պահանջներին համապատասխանող գնահատելուն պարտավորեցնելուն՝ Ընկերության բողոքով ներկայացրած պահանջներին, ապա Բողոքներ քննող անձը գտնում է, որ այն անհիմն է, մերժման ենթակա, հետևյալ պատճառաբանությամբ.

Օրենքի 50-րդ հոդվածի 7-րդ մասի համաձայն՝ գնումների հետ կապված բողոքներ քննող անձը՝

1) իրավունք ունի պատվիրատուի և գնահատող հանձնաժողովի գործողությունների կամ անգործության վերաբերյալ ընդունելու հետևյալ որոշումները.

ա. արգելելու կատարել որոշակի գործողություններ և ընդունել որոշումներ,

բ. պարտավորեցնելու ընդունել համապատասխան որոշումներ, ներառյալ՝ չկայացած հայտարարելու գնման ընթացակարգը, բացառությամբ պայմանագիրը անվավեր ճանաչելու մասին որոշման...:

Վերոնշյալ հոդվածների դրույթների համակարգված վերլուծության արդյունքում, Բողոքներ քննող անձն արձանագրում է, որ Բողոքներ քննող անձը որոշում է ընդունում միայն պատվիրատուի և գնահատող հանձնաժողովի գործողությունների կամ անգործության վերաբերյալ, իսկ վերը նշված պահանջները՝ գնահատող հանձնաժողովի որևէ գործողությանը կամ անգործությանը չի վերաբերում, որպիսի հիմքով հնարավոր կլիներ այս պահանջների մասով բողոքը բավարարել:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 1-ին կետի «բ» ենթակետով՝ ՀՀ գնումների հետ կապված բողոքներ քննող անձը.

Ո Ր Ո Շ Ե Ց

«Մովսեսյան» ՍՊԸ-ի կողմից 07.05.2019թ. ներկայացրած բողոքը բավարարել մասնակի:

Պարտավորեցնել դադարեցնել «ԵԲ-ԳՀԱՊՁԲ-19/45» ծածկագրով գնահատող հանձնաժողովի 30.04.2019թ. ժամը 11:00-ի նիստի թիվ 4 արձանագրության 1.2 և 1.3 կետերով կայացված որոշումները:

Մնացած մասով բողոքը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ գնումների հետ կապված
բողոքներ քննող անձ՝**



ԼԵՎՈՆ ՕՇԱՆՅԱՆ